



PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
Ustavno - pravna komisija
Broj: 01/1-011-1527/03
Sarajevo, 06.11.2003.

Z A P I S N I K
sa 17. sjednice Ustavno - pravne komisije

Sjednica je održana 06.11.2003. godine s početkom u 11,00 sati.

Sjednici su prisustvovali članovi Komisije:

1. Beriz Belkić
2. Mirsad Ćeman
3. Seada Palavrić
4. Petar Kunić
5. Nijaz Duraković
6. Martin Raguž

Sjednici su takođe prisustvovali: Lidija Korać u ime Izbornr komisije BiH, Tria Džonson iz Komisije za reformu odbrane.

Sjednici je prisustvovao sekretar Komisije Milan Zjajić.

Sjednici nisu prisustvovali Članovi Komisije: Momčilo Novaković, Tihomir Gligorić i Ivo Miro Jović.

Predsjedavajući Komisije Mirsad Ćeman, je pozdravio goste i članove Komisije i predložio sljedeći:

D N E V N I R E D

1. Verifikacija Zapisnika sa 15. sjednice održane 20.10.2003 i 16. sjednice održane 23.10.2003. godine
2. Prijedlog zakona o odbrani Bosne i Hercegovine, predlagáč Vijeće ministara BiH,
3. Prijedlog zakona o izmjenama i dopunama Zakona o Vijeću ministara Bosne i Hercegovine, predlagáč Vijeće ministara BiH,
4. Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine, predlagáč Vijeće ministara BiH,
5. Davanje mišljenja o amandmanima na Prijedlog zakona o izmjenama i dopunama Zakona o sukobu interesa u institucijama vlasti Bosne i Hercegovine, prijedlog poslanika Nikole Špirića,
6. Ostala pitanja.

Predloženi dnevni red je jednoglasno prihvaćen uz izmjenu redosljeda tačka dnevnog reda, tako da je tačka 5. pomjerena i razmatrana kao tačka 3. Do ove izmjene je došlo na zahtjev Martina Raguža, koji je imao druge obaveze.

Ad. 1. Verifikacija Zapisnika sa 15. sjednice održane 20.10.2003 i 16. sjednice održane 23.10.2003. godine,

Zapisnik sa 15. sjednice održane 20.10.2003. godine je bez primjedbi verifikovan.

Zapisnik sa 16. sjednice održane 23.10.2003. godine je takođe bez primjedbi verifikovan.

Ad. 2. Davanje mišljenja o amandmanima na Prijedlog zakona o izmjenama i dopunama Zakona o sukobu interesa u institucijama vlasti Bosne i Hercegovine, prijedlog poslanika Nikole Špirića,

Predsjedavajući Komisije je podsjetio članove Komisije na zaključak Predstavničkog doma o produženju roka za ulaganje amandmana na Prijedlog zakona o izmjenama i dopunama Zakona o sukobu interesa u institucijama vlasti BiH, kao i na činjenicu da je Komisija već usvojila jedan amandman Petra Kunića, koji je uz saglasnost predlagača inkorporiran u tekst Prijedloga zakona i da je takođe, Komisija utvrdila pravno-tehničku obradu ponuđenog teksta Prijedloga zakona.

Zatim se za riječ javila Lidija Korać, član Izborne komisije BiH, koja je u kraćoj diskusiji upoznala članove Komisije o problemima koji su se javljali u primjeni Zakona o sukobu interesa u institucijama vlasti BiH i istakla da su ti problemi bili razlog da Izborna komisija BiH sačini tekst izmjena, koje su prije svega praktične prirode. Taj tekst je u parlamentarnu proceduru kao Prijedlog Zakona o izmjenama i dopunama zakona predložio poslanik Nikola Špirić. Osvrćući se na predložene amandmane istakla je da bi se njihovim usvajanjem u mnogome izgubio smisao sukoba interesa i sugerisala da se amandmani odbiju.

Zatim je Komisija pristupila izjašnjavanju o amandmanima koje su uložili poslanici: Hasan Muratović, Izet Hadžić, Elmir Jahić, Beriz Belkić, Ivo Miro Jović i Milorad Živković.

Nakon provedene rasprave Komisija je većinom glasova prihvatila sljedeće amandmane:

Amandman I (predlagač Izet Hadžić)

U članu 3. stav 1. tačka b) mijenja se i glasi:

"Bliskim srodnikom smatraju se bračni drug, otac, majka i djeca ukoliko žive u zajedničkom domaćinstvu"

Amandman II (predlagač Izet Hadžić)

U članu 3. stav 1. tačka c) alineju 3. ne treba brisati.

Amandman III (predlagač Hasan Muratović)

U članu 4. brisati tekst pod 3. i 4. (ovaj amandman obuhvata i amandman Elmira Jahića koji je predlagao brisanje tačke 4.)

Amandman IV (predlagač Ivo Miro Jović)

U članu 5. tačka 1. zadnja rečenica se briše.

U članu 5. tačka 2. zadnja rečenica se briše.

Amandman V (predlagač Milorad Živković)

U članu 8. tačka 1. mijenja se i glasi:

"Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim javnim preduzećem, osim pod uslovima navedenim u članu 11. tačka 2. ovog Zakona."

Amandman VI (predlagač Hasan Muratović)

U članu 8. stav 2. se mijenja i glasi:

" Izabrani zvaničnici nosioci izvršnih funkcija i savjetnici ne mogu biti članovi organa ili komisija koje odlučuju, niti glasati kada se, u bilo kojem organu, bilo kojeg nivoa vlasti, odlučuje o sklapanju usluga sa preduzećem ili drugim pravnim ili fizičkim licem sa kojim oni imaju ugovor o pružanju usluga ili bilo kakvu poslovnu povezanost."

Amandman VII (predlagač Beriz Belkić)

U članu 11. stav 1. dodaje se rečenica:

"Iznimno od prethodnih odredbi, izabrani zvaničnici, nosioci izvršne funkcije i savjetnici mogu obavljati izvršnu dužnost u fondacijama i udruženjima osnovanim u skladu sa Zakonima o udruženjima i fondacijama."

U članu 11. stav 2. mijenja se i glasi:

"Izabrani zvaničnici, nosioci izvršne funkcije i savjetnici mogu obavljati poslove u javnim nastavnim, zdravstvenim ili naučnim, te kulturnim i sportskim ustanovama, nevladinim neprofitnim organizacijama, fondacijama i udruženjima pod uslovima utvrđenim entitetskim Zakonom o radu i drugim propisima." (obuhvata alternativu amandmanu II Milorada Živkovića i raniji amandman Petra Kunića)

U članu 11. stav 3. dio teksta se briše tako da glasi:

"Izabrani zvaničnici, nosioci izvršne funkcije ne smiju obavljati poslove savjetnika."

Amandman VIII (predlagač Hasan Muratović)

Član 13. se briše.

Komisija je zatim prihvatila tekst Zakona o izmjenama i dopunama Zakona o sukobu interesa u institucijama vlasti Bosne i Hercegovine sa usvojenim amandmanima i konstatovala da je zakon neophodno donijeti i za izvjestioca u plenarnoj fazi imenovala predsjedavajućeg Mirsada Ćemana.

Ad. 3. Prijedlog zakona o odbrani Bosne i Hercegovine, predlagač Vijeće ministara BiH,

Nakon prelaska na ovu tačku dnevnog reda predsjedavajući je dao riječ gospođici Džonson iz Odjela za stabilizaciju OEBS-a, koja je i član Komisije za reformu odbrane.

Tria Džonson je u iscrpnoj diskusiji upoznala članove Komisije o aspektima predloženog zakona, posebno se osvrnula na ustavni osnov za donošenje i na kraju ističući da za njegovo donošenje postoji politički konsenzus iznijela zaključke Narodne skupštine Republike Srpske, koji su na tragu postignutog konsenzusa i kompromisnih rješenja.

Petar Kunić je zatim, dodao da Narodna skupština Republike Srpske još nije donijela odgovarajuću odluku o prenošenju nadležnosti i da se on neće moći izjašnjavati i da kao jednika nije u stanju preuzeti odgovornost i da će napustiti sjednicu.

Potom se na sjednicu vratio Martin Raguž i Komisija je nastavila rad glasanjem.

Komisija je jednoglasno, sa pet glasova "za", utvrdila da:

1. Postoji valjan ustavno-pravni osnov za donošenje Zakona o odbrani Bosne i Hercegovine,
2. Ustavni osnov sadržan je u članu III. tačka 5.; članu III. tačka 1.; članu III. tačka 2. i članu IV tačka 4. Ustava Bosne i Hercegovine, kako je i naveo predlagač,
3. Ponuđeni tekst se može uputiti nadležnoj komisiji Predstavničkog doma Parlamentarne skupštine BiH u dalju proceduru.

Ad. 4. Prijedlog zakona o izmjenama i dopunama Zakona o Vijeću ministara Bosne i Hercegovine, predlagač Vijeće ministara BiH,

Bez posebne rasprave Komisija je jednoglasno, sa pet glasova "za", utvrdila da:

1. Postoji valjan ustavno-pravni osnov za donošenje Zakona o izmjenama i dopunama Zakona o Vijeću ministara Bosne i Hercegovine,
2. Ustavni osnov sadržan je u članu IV tačka 4. Ustava Bosne i Hercegovine, kako je i naveo predlagač,
3. Ponuđeni tekst se može uputiti nadležnoj komisiji Predstavničkog doma Parlamentarne skupštine BiH u dalju proceduru.

Ad. 5. Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine, predlagač Vijeće ministara BiH,

Bez posebne rasprave Komisija je jednoglasno, sa pet glasova "za", utvrdila da:

1. Postoji valjan ustavno-pravni osnov za donošenje Zakona o izmjenama i dopunama Zakona o ministarstvima i drugim organima uprave Bosne i Hercegovine,
2. Ustavni osnov sadržan je u članu IV tačka 4. Ustava Bosne i Hercegovine, kako je i naveo predlagač,
3. Ponuđeni tekst se može uputiti nadležnoj komisiji Predstavničkog doma Parlamentarne skupštine BiH u dalju proceduru.

Ad. 6. Ostala pitanja,

Nije bilo prijedloga za ovu tačku dnevnog reda.

Pošto je dnevni red bio iscrpljen predsjedavajući je u 16,10 sati zaključio sjednicu.

SEKRETAR KOMISIJE
Milan Zjajić

PREDSJEDAVAJUĆI KOMISIJE
Mirsad Ćeman